



Parlamentario Xiomara Ruiz-Maduro

*Segun Parlamentario Xiomara Ruiz-Maduro*

## Santananan na Aruba ta yen y por mira hopi actonan di vandalismo ta tuma luga

**ORANJESTAD** – Durante tratamiento di ley di cremacion cu a tuma luga ayera den Parlamento, cu a haya full sosten di Parlamento, Parlamentario Xiomara Ruiz-Maduro di Movimiento Electoral di Pueblo (MEP) ta bisa cu nan a probecha di puntra Minister Richard Visser con ta para cu e santananan cu Aruba tin actualmente. Motibo pa esaki, segun Ruiz-Maduro, ta pasobra cu tin santananan cu awor aki ta yen y por mira hopi actonan di vandalismo ta tuma luga. Y nan tabata kier a sa kico Gobierno tin pensa

cu esakinan.

### MAS ESPACIO

Segun Ruiz-Maduro, Minister a indica cu DOW (Dienst Openbare Werken) lo ta esun cu lo bay encarga di tur e tres (3) santana publico. Y tambe e santana di Sabana Basora lo wordo amplia proximamente pa asina tin mas espacio.

Aki tambe lo bin un muraya apart unda lo pone e urnanan di esun nan cu lo wordo crema y tambe lo percura pa pone e debido me-

didanan di siguridad pa evita actonan di vandalismo. “Pasobra locual ta e santananan catolico, esakinan ta yen caba,” Ruiz-Maduro ta bisa.

### ACTO DI VANDALISMO

Ruiz-Maduro ta remarca cu nan a haci pregunta na a mandatario pa loke ta trata e actonan di vandalismo cu a sosode riba e graf di defunto libertador Betico Croes den felis memoria, pero esaki a referi nan na Minister di Husticia Sr. Arthur Dowers pa nan por haya e contesta cerca dje. □

*Parlamentario Xiomara Ruiz-Maduro*

## Ley di cremacion a wordo presenta ayera den Parlamento

**ORANJESTAD** – Ayera Parlamento di Aruba a trata e ley di cremacion. Uno cu segun Parlamentario Xiomara Ruiz-Maduro di Movimiento Electoral di Pueblo (MEP) tabata un inicio di Sr. Andy Lee y Sr. Jacobs algun tempo pasa. Y awor riba iniciativa di Parlamentario Sneek cu yudansa di Griffier van der Windt, a percura pa esaki por tabata presenta ayera den Parlamento.

### DETAYES

Segun Ruiz-Maduro, e ley di entiero cu nos tabatin, ta uno hopi anticua cu ta duna e

opcion si pa haci cremacion. Pero e reglanan mester a wordo stipula pa loke ta trata e luga di cremacion, emolester pa cu e bario, pero tambe e parti di higiena. “Nos a comprende di Minister Visser como tambe e iniciado, Sr. Sneek, cu esakinan lo bay bin den un ‘Landsbesluit’ separa. Y cada permiso lo bin cu tur e rekisitonan separa,” Ruiz-Maduro.


### SOSTEN DI PARLAMENTO

E ley aki a conta cu e sosten completo di Parlamento. Ki-

ermen awor aki habitantenan di Aruba cu tabata scoge pa cremacion y cu antes mester a biaha pa exterior, cu den mayoria caso tabata Corsou, por haci esaki na Aruba mes.

### INICIO

Segun Ruiz-Maduro, no ta conoci ki dia e cremacion por cuminsa ya cu Minister Visser a indica cu pa e ley lo pone cu mester traha seis (6) ‘Landsbesluit’ extra y ta te ora cu e ‘Landsbesluitnan’ aki ta cla cu tur su rekisitonan poni, cremacion lo por cuminsa na Aruba. □



Urna, esaki ta posibel reemplazo pa caha di morto na momento cu ta scoge pa cremacion.